

lјicu, kod Crnih Kranjaca »ošpetel« nazvana. Cipele (»čižmice«) behu na »zaplet«, po neki putu nosilo se kožom obšivene vunene opanke (»kopice«).

U zimsko doba nosile su Belokranjice »zabunec« ili »kožuh« ukrašen bilinskim motivima u crvenoj boji ili vunen »veliki robec« preko leđa. Nekada su devojke imale preko čela prvezanu »partu« urešenu crvenim i belim zrncima od stakla. Naša slika predstavlja odelo, kao što su ga nosile venčane žene u podzemaljsko-metličkom polju u Beloj Krajini.

U pogledu psiholoških osobina Belokranjci su, živeći u milom podneblju i plodnoj ravni uz Kupu, isto tako meki i osećajnog značaja kao što je makan i tok linija na njihovim licima. Nemaju ništa grubog na sebi kao što je obično kod fisionomije severnjaka. Značaji su nežnog osećaja, gotovo slavensko-sentimentalni i upravo takvo je i opštenje između Belokranjaca.

Jednu od pravih belokranjskih duša predstavlja naša slika od ljubljanskog umetnika Ivana Vavpotića iz godine 1924. Model je psihološki i spolja dobro pogoden. Duševljevno je obeležio ženu time, što ju je postavio u crkvu pred raspeće sklopiljenih ruku. Mirna, bela postava u polumraku

crkve dejstvuje na osećaj gledaoca: te na pola oborenje oči i nepomično lice govore ka resignacija sama. I u takovih mirnih lica kriju se prestale borbe, žalosti i očajanje. Uporedi samo Michelanglovo Pieta ili Meštrovićevu »Moju majku«. Čudnovato je, da Meštrovićeva slavna skulptura i naša slika od J. Vavpotića naliče jedna na drugu nu da su po svom postanku sasvim nezavisne u konceptiji. Sva dobrota žene i majke odseva sa mekog obrazu, sva patnja oko vaspitanja njezine osmero dece, sva bolest majke, koja je imala u ratu svih sedam sinova i koju su austrijski ratni žandarri progonili zbog srbofilstva i jugoslovenske svesti, njezine i njezine dece. Zato je umetnik udahnuo slici resignativan mir, postavio je tu majku u crkvu pred Razapetog, gde traži utehu bolesnoj duši. Čini se, da ju je i postigla u očima napačenog Božjeg Sina. Ono plamenje crvenog kandila pred raspećem, koje baca mistične refleksje potelu Krista, dejstvuje još mirnije na mīr prizora.

Naša slika predstavlja jednu od najboljih matzri, psihološki i etnografski pravi tip Belokranjice.

Stanko Vurnik.

#### PUBLIKACIJE.

Najstariji dalmatinski rukopis Evangeliarium Spalatense. Paleografska studija o nepoznatoj školi poluuncijale osmoga stoljeća. Napisao Viktor Novak. Split. Narodna tiskara. 1923. (I. prilog Vjesniku za arheologiju i historiju dalmatinsku god. 1923) 8°. 88 str. + 7 tablica faksimila.

Već u svojoj monografiji o beneventanskom pismu (Scriptura Beneventana. Zagreb 1920.) imao je autor ove paleografske studije priliku da prikaže specijalan razvijetak, kojega je imala beneventana, kao vrsta latinskog pisma srednjevekovne Europe, u Dalmaciji od X. do XIII. stoljeća. O vlastitom životu i evoluciji latinskog pisma u srednjevekovnoj Dalmaciji govoriti ova studija o »splitskom evangelijaru«, samo ne baziraju njezini rezultati na onako velikom broju rukopisa, kao što studije o beneventanskom pismu, nego su utvrđeni u glavnom samo na osnovi jednog, to jest kodeksa splitskog kaptola, koji obuhvata tekst evanđelija a u literaturi je poznat pod imenom »splitskog evangelijaria« (Evangeliarium Spalatense). Baš ova literatura zanima autora u uvodu njegove studije i daje mu priliku da korigira mnoga pogrešna mišlje-

nja (naročito Devića i Neumanna) o inače tako dugo u naučnom svetu nepoznatom splitskom kodeksu. Moderna paleografska metoda je dovela gospodina Novaka do sasvim novih rezultata, koji nisu važni samo za istoriju razvitka latinskog pisma u našoj zemlji, nego u ondašnjoj Europi uopšte. S doslednom metodom, koju znamo i iz drugih njegovih paleografsko-diplomatiskih radova, vodi nas autor do svojih rezultata. »Evangeliarium Spalatense« je napisan osobitim tipom polu-unciale te je prema mišljenju gospodina Novaka nastao u Splitu u drugoj polovini VIII. stoljeća kao elaborat jedne mlade paleografske škole, koja, inače bez velikih umetničkih tradicija, pokazuje frapantne sličnosti i paralelu sa savremenom čuvenom paleografskom školom polu-unciale u Toursu u Francuskoj (prim. slovo r). Postanak splitske škole je savremen s reorganizacijom solinske hierarhije u Splitu na kraju VIII. stoljeća u vreme nadbiskupa Ivana Ravenjanina. U detaljnjoj paleografskoj analizi pisma glavnog teksta »splitskog evangelijaria«, kojega je pisalo šest pisara, prikazao je gospodin Novak karakteristične znakove splitske polu-uncialne škole. Ova pokazuje uz dosta

veliku monumentalnost pojedinih obliku i opšteg duktusa ipak u mnogim pogledima veliku nesredenost i podvojenost kronoloških kriterija. Osobito karakteristična su slova **f** i **r**, dalje uncialno **a** i **g**. Spomenuto bi da ne kaže a samo u mlađoj fazi nego i već u starijoj fazi (VI. stolj.) polu-unciale ukrasni potezic. Uopšte su za polu-uncialnu karaktestična slova **b**, **d**, **e**, **g**, **h**, **l**, **m**, **n**, **s** i **t**. Osobito ona koja završavaju izveštačenim kratkim potezicima pokazuju na mlađu fazu, a baš ovake oblike nalazimo u našem rukopisu. Gospodin Novak nije došao do svojih rezultata samo na osnovi paleografske analize, nego i pomoću snavnivanja ortografije, jezika i unutrašnjih istoriskih razloga. Daljnja proučavanja kodeksa sa strane filologa i teologa mogla bi prema mome mišljenju samo utvrditi rezultate gospodina Novaka o poreklu i postanku »splitskog evangelijskog«. Autorovi rezultati toliko su važniji, jer su utvrđeni na osnovi studija jednog rukopisa, koji je nastao u jedno za latinsku paleografiju ovako važno doba, kako je baš to doba karolinške reforme latinskoga pisma. Paleografska analiza »Evangeliarium Spalatense« pokazuje stihove u ranim primerima karolinške reforme (slova **s** i **u**). Naš kodeks je primer univerzalnosti latinskog pisma Europe onog doba, koje je obuhvatalo i dalmatinsko Primorje te je ovde u jednoj do sada nepoznatoj školi, slično kao u nekim drugim zemljama Europe VIII. stoljeća, formuliralo polu-uncialu na jedan specijalan način.

Osim glavnog teksta pisanih u polu-unciali analizirao je gospodin Novak i marginalne note i pripise, pisane mlađom rimskom kurzivom, karolinškom minuskulom, beneventanom i gotičkom minuskulom.

Osobito važni su pripisi, pisani mlađom rimskom kurzivom, pa su u tom pogledu, prvi poznati dalmatinski primeri, postali krajem VIII. stoljeća. Upozorio bih, da su ovake glose u docnijim polu-uncialnim rukopisima poreklom i iz drugih europskih zemalja, česte (prim. glose u rukopisima Vergilija). Ovi pripisi različitog pisma pokazuju genetski skroz naskroz kontinuitet latinskoga pisma u Dalmaciji od VII. pa sve do XIII. stoljeća i daju važne priloge za regionalnu latinsku paleografiju u Dalmaciji. Iz ovog područja očekujemo od g. Novaka i nadalje radova, koji, kako smo to videli u slučaju »splitskog evangelijskog«, nisu važni samo kao radovi iz područja istoriskih pomoćnih disciplina, nego nam baš kao takvi mogu objasniti mnoge inače tamne partie iz naše političke, crkvene i kulturne istorije.

M. Kos.

Uspomene o knjizi \* \* \* \* \*

»Stihovi na povaljskom natpisu iz XII. veka. Pod tim je naslovom g. Dr. Petar Kolendić u skopskoj reviji »Južna Srbija« (oktobar-nov.-dec. 1924. br. 46,47) napisao raspravu o cirilskom natpisu, koji se je očuvao na nadvratniku nekadašnjeg benediktinskog samostana Sv. Ivana na otoku Braču. Taj su natpis tumaćili već u 18. stoljeću, ali bez uspeha. Njime se je bavio Rački (Starine XIII), Fr. Radić (u »Starohrvatskoj Prosvjeti«, organ Kninskoga Muzeja, 1895), dr. Vl. Čorović u »Južnoslovenskom Filologu« 1921. Gosp. Kolendić nalazi, da je naipis predstavljao 6 starih dvanaesteraca, kakovi su u ono doba bili obični u Vizantu, te ističe, prvo, kako su katolički benediktinci pored glagoljaške, gajili eto i cirilsku književnost, a drugo, da se odsle pri proučavanju tehnike dvanaesteraca ove stare naše umetne poezije treba obazirati i na ovakve refleksne vizantijske metrike.

Dr. Fr. I.

\*

Мирковић Лазар, Српска плаштаница монахије Јефимије у Путни. (Гласник, службени лист српске православне цатријаршије V (1924) 214-6.)

M. je u svojoj studiji o Monahinji Jefimiji (isp. Narodna Starina, 3, 336—7) mogao samo spomenuti plaštanici, koju je vezla česarica Jefimija zajedno s monahinjom Eupraksijom, a koja se sada čuva u manastiru Putni u Rumuniji. O grčkom natpisu na krasno izvezenoj plaštanici razbijao je glavu još Iarion Ruvarac. No bez uspeha. Ni M. nije dospeo do rezultata, koji bi ga potpuno zadovoljili. Isto tako ne ume da razjasni, ko je monahinja Eupraksija, ni O Tafrali, koji je nedavno napisao izveštaj: Le trésor byzantin et romain du monastère de Poutna (Académie des inscriptions & belles lettres, Comptes rendus des séances de l'année 1924., 365—72); godina 1405, koja zanima M., spominje se uz plaštanicu samo u inventaru.

N. Radojićić.

\*

Novci i pečati bugarskih careva. Nedavno je izdao narodni muzej u Sofiji knjigu Nikole A. M. Štovava pod naslovom: Монетитъ и печатитъ на българскиятъ царе, која је заврједила, да се са пар ријечи осврнемо на њу. Poznato је, да се jugoslavenska numizmatika од Šafařika i Ljubića amo, који покушаše, да је у цјелини обраде, бавila већином objavlјivanjem i обрађivanjem пригодних nalaza, dakle тек сабирањем grade za opsežniji rad. А да се lati izradivanja monografija pojedinih numizmatičkih grupa,

na to je malo tko pomišlja. Tako, osim one moje monografije hrvatske numizmatike (»Slavonski banovci. Prinos hrvatskoj numizmatici«), a koju sam bio izdao prije nekih dvadesetak godina, nemamo niti jedne monografije, koja bi specijalno obradila numizmatiku pojedinih jugoslavenskih država. Niti su Srbi do danas dospjeli, da monografski obrade numizmatiku Srbije, niti je u tom vidu obrađena numizmatika Bosne ili ona dalmatinskih i crnogorskih gradskih republika. Tek za dubrovačku izišlo je sada djelo dr. Milana Rešetara među izdanjima Kralj. Srpske akademije nauka. Prvi, koji se, nakon svih patnja svjetskog rata i poratnih prilika, latise ozbiljna znanstvena rada, jesu Bugari, koji eto sada monografski obradiše svoju numizmatiku i time se staviše na čelo ostalim jugoslavenskim zemljama i narodima prvi. Mušmovljeva radnja predstavlja se u tom vidu kao djelo, kojemu će svaki nepristran čovjek priznati veliku kulturnu vrijednost.

Što se same knjige tiče, ona je izrađena po shemi, po kojoj je i Ljubić izdao svoj »Opis jugoslavenskih novaca«, ali je bugarska numizmatika naravno u Mušnova kud i kamo obiljnije obrađena a sistem je, uz nužne rektifikacije proširen prema rezultatima novijih obreta i studija.

Opisani su tu novci od petnaest bugarskih careva, počevši od Asjena II. (1218. do 1241.) do Ivana Šišmana (1371.—1393.) a pisac ih dijeli na dvije periode i ubraja u raniju novce do Ivana Aleksandra, a u potonje njegove i njegovih nasljednika.

Tipološka grupacija bugarskih novaca jedan je od najtežih problema numizmatike, jer bugarski novci predočuju dojmova raznolikih i posve oprečnih kulturnih struja. Jedan dio, i to stariji, stoji posvema pod dojmom bizantskog stila te predstavlja barbarsku imitaciju suvremenih, po sebi već dosta barbarizovanih, bizantskih novaca. Drugi ide u grupu imitacija mletačkog matapanata, koji je u balkanskoj trgovini igrao veliku ulogu pa su ga zato naslijedovali ne samo u Srbiji (Uroš III.) i Hrvatskoj (Šubići), nego, kako iz Mušmovljeve radnje vidimo, i u Bugarskoj. Srpski dojam očit je u nekih novaca Mihajla Šišmana, koji, isto kao na Dušanovim, prikazuju cara kao konjanika, a kao rad monetara dobavljenih iz zapadne Evrope predstavljaju se jedino groševi Ivana Sracimira, koji su u Bugarskoj jedini predstavnici bolje monetarske tehnike.

Tipično bugarski elemenat na bugarskim novcima jesu oni raznovrsni i vrlo komplirani monogrami, koje će čak i strukovnjak tek nakon neke muke znati ispravno pročitati, a jedna od osobitih vrlina Mušmovljeve knjige jest ta, da je sve te sigle

i monogramne pregledno složio na šest strana na kraju svoje radnje.

Što se tiče determinacije, odvojio se je pisac od starije škole (Šafařík, Ljubić) u toliko, što je novce, koje su stariji numizmatici pripisivali Asjenu I. i Asjenu II. dodijelio Ivanu Aleksandru. On je tu pristao uz Lj. Kovačevića, koji je u Glasniku kr. Akademije, LXXVI, 69 100, 1908. razložio, da se monogram na tim novcima ima čitati **Ајен** (Asjen) a ne **Асјен** — Od argumenata, koji se navadaju tome u prilog, bio bi najjednostavniji taj, da u monogramu ime Asjen nebi smjelo biti slovo e nego mjesto njega њ. Tako je iz bugarske numizmatike definitivno uklonjena jedna zabluda, koja se njom povlačila toliko decenija.

Zanimljiv prilog ovoj radnji je sfragistički popis pečata bugarskih careva, a sravnimo li im slike sa slikama novaca, pasti će nam u oči tehnička razlika između jednih i drugih, jer su pečati, i ako posve u bizantskom stilu, kud i kamo pomnije rezani nego pečati novaca.

Veliku vrijednost daje radnji ono 266 u tekstu uvrštenih slika, koje vrlo olakšavaju i skraćuju opis pojedinih tipova a osim toga dodano je na kraju 7 autotipnih tabla sa fotografskim reprodukcijama najvažnijih tipova, koje čitatelju dozvoljavaju, da kontrolira ispravnost autorovih opisa.

Ova knjiga bez sumnje je standard-work, koji ne smije da uzmanjka ni u kojoj biblioteci, namijenjenoj studiju balkanskih zemalja, a biti će od velike vrijednosti za svakog numizmatika i sabirača, koji si je odabralo Balkan područjem svoga rada.

Tipografska izrada odgovara u svakom obziru, a cijena — 170 leva — može se, uvaživši današnje knjižarske prilike, nazvati upravo neznačnom.

Promatrajući ovo izdanie, moramo da zavidjamo braći Bugarima; jer dok u nas poradi oskudice sredstava i interesa odlučnih faktora trune toliko vrsnih sila od prisilnog nerada, Bugari eto mogu da izdaju djelo, na kakovo mi, podemo li dosadanju putem dalje, još koji desetak godina nećemo smjeti ni pomicati.

Dr. Ćiro Truhelka.

\*

Никола Радојчић, Снага закона по Душанову Законику. Глас Српске кр. Академије. CX. Београд 1924.

Zakonik cara Stefana Dušana od g. 1349. i 1353./4. obraća stalno na sebe pažnju cijelog učenog svijeta, a naročito slovenskog. To on po svojoj važnosti, i kao kulturni i pravni spomenik u punoj mjeri zasluguje. Rijetko je koji spomenik toliko koncentrično ogledalo svoga vremena kao

taj Zakonik, koji pruža uvijek novih strana za ispitivanje. Očigledno literatura, koja se na nj odnosi vidnom je posljedicom toga interesovanja. Pa ipak, kad uočimo svu tu literaturu, ne možemo se tu nikako oteti dojmu, da sve to nije dostatno, da nam razjasni premnoga, i to sasvim osnovna pitanja kod toga spomenika, pa da bi valjalo sa stručne strane preduzeti jednu suptilnu i duboku analizu Zakonika i pojedinih njegovih norma, utvrditi nedvoumno njegov općeniti karakter, pa onda sistematski prikazati njegovu sadržinu, a na kraju (a to je možda i najpotrebnije), da se ispita u kome odnajuju stoji norme Zakonika prema stranim izvorima. Koliko je taj rad potreban pokazuje nam i nevelika, ali sadržajna studija g. Radojičića, koji je takovu analizu proveo u jednom specijalnom pitanju u okviru Dušanova Zakonika.

G. Radojičić ograničio se na dva člana — na 171. i 172. — uzimajući još u pretres uz to čl. 105. U čl. 171. naređuje se, da sudije, vršeći svoju dužnost, ne smiju uzimati obzira na takove carske povelje, koje stoje u protivštini sa Zakonikom i koje nijesu u skladu s pravdom i zakonom, kako to određuje Zakonik, nego da imadu suditi jedino po pravdi. Čl. 172. opet nalaže sučima, da imadu suditi jedino po Zakoniku, a ne iz straha pred carem. Čl. 105. naređuje, da su sudije dužni one carske povelje, koje budu pred njih iznešene, a koje su po Zakoniku ništetne, pa ih i sudije takovima smatraju, donijeti caru, očito u svrhu, da car o tome konačno odluči.

G. Radojičić prikazuje, kako su se ti članci smatrali u literaturi originalnima, tako te su bili ponos srpskog zakonodavstva srednjega vijeka, predstavljajući, da bi se srpsko pravo i dalje u tom pravcu jedne naskroz pravne države razvijalo, da nije taj razvoj nasilno prekinut. Međutim g. Radojičić sumnja, da bi takove odredbe mogle biti samostalan produkt srpskoga onovremenog pravnog shvaćanja, i da bi mogli zakoni ovakove sadržine organički iz njega izrasti. Njegovu je sumnju dalje pojačalo još i proučavanje pravnog razvoja u drugim srednjevjekovnim državama, gdje se slične norme javljaju tek na kasnijoj i mnogo višoj razvojnoj stepenici nego što je ona do koje se srpsko srednjevjekovno zakonodavstvo uopće imalo vremena razvijati. Zato g. Radojičić, tražeći porijetlo tim ustavovama u stranim izvorima, lijepo i onda podrobnno ispituje, kako je pitanje odnosa vlasta i zakona bilo uređeno u rimsko-vizantiskom zakonodavstvu od IV. do XII. stoljeća. Na kraju dolazi onda g. Radojičić do ovog zaključka: »Članovi, dakle, Dušanova Zakonika 171. i 172., kojima se određuje položaj cara prema državnim za-

konima i utvrđuje njihova svemoćna snaga, nisu samostalni, nego su uzeti iz rimsko-vizantinskog prava. Odakle su baš direktno presaćeni u Zakonik, to se baš s punom sigurnošću ne može reći. Najverovatnije je da su uzeti ili iz punih ili iz skraćenih Vasilika, i to iz punih ne iz drugih, nego iz sedme knjige, prve titula, člana 16. i 17., gdje je govor o sudijama. Srpski su zakonodavci, razume se, morali vizantiske zakone skratiti i uprostiti, udesiti ih prema razvojnoj stepenici na kojoj se tadašnje srpsko pravo nalazilo, i pooštiti im ton prema energičnoj dikciji, koja je karakteristična za celi Dušanov Zakonik. Pozajmica je, svejedno, ostala potpuno očvidna, kako se vidi, kad se isporede s izvodom baš ona mesta izvora, koja je srpski zakonodavac držao za najvažnija«.

Analiza i cijela argumentacija g. Radojičića provedena je iscrpivo, sigurno i s mnogo ubjedljivosti. Unatoč toga želio bih spomenuti neke okolnosti, koje mi izgledaju važne za rješavanje problema, koji je u pitanju, a koje ga mogu osvijetliti i s druge strane.

Prije svega treba naglasiti, da čl. 171. i 172. nije ni doslovno jednak onim normama rimsko-vizantinskog prava, na koje se kao izvor poziva g. Radojičić, nego se tu radi o sličnosti po smislu, tako da na osnovi samog sravnjivanja tekstova ne možemo još izreći konačna suda o pozajmici, nego treba tu zavisnost, kako to i čini g. Radojičić, pokušati obrazložiti i drugim argumentima.

Naročito bih htio istaknuti, da glede odnosa vladara prema zakonu postoji između vizantiske imperije i sredovjekovne Srbije osnovna razlika. Vizantinska je imperija bila apsolutna monarhija, u kojoj je autokrator-vasilevs bio ujedno i legislator, tako da je ovde još uvijek problemom, u koliko je je on vezan na zakone što ih sam izdaje, i kako se odnose sudije prema njegovim egzekutivnim aktima koji nijesu u skladu sa zakonima. Car može sam sebe da veže normom, da i za njega važi zakon, pa da sudije ne moraju respektovati one njegove egzekutivne akte, koji se protive zakonima. Takovom se normom izriče nešto, što još nije po sebi razumljivo, što bi proizlazilo iz same prirode stvari, nego što treba principijelno utvrditi, pa da onda važi. U Srbiji stoji stvar drugačije. Srbija se je uopće u svome državnom uređenju povodila više za srednjeevropskim državama, negoli za Vizantom, pa tako je bilo i u tome pravcu. Vladar u Srbiji nije bio apsolutista, nego mu je legislatorična vlast bila ograničena saborima. Tu ne može biti ni začas sumnje, da vladara vežu za-

koni naprosto zato, jer njihova egzistencija i nije jedino od njegove volje odvisna. Prema tome izlazi iz same prirode stvari, da takov vladar može egzekutivu vršiti jedno u skladu sa zakonima, a ako on radi protivno tome, on vrijeda normu, koja je nastala saradnjom njegovom i saborskog, a koju on ne može nikako jednostrano da mijenja. Ako se dakle tu izdaje norma, koja određuje, da je zakon najviši regulativ, onda se time utvrđuje tek nešto što je po sebi jasno, a izreka ta imade samo deklatorni karakter, da se spriječe eventualne zloupotrebe. Ako se dakle u jednoj apsolutističkoj državi izreče načelo, da je vladar podložan postojećim zakonima, onda u tome možemo gledati neku višu stepenicu pravnog shvaćanja, ali u jednoj ograničenoj monarhiji takvo je stajalište samo nužna posljedica tamošnjeg vladarskog položaja uopće. Ne čini mi se, dakle, a priori nemoguće, da bi srpsko zakonodavstvo srednjeg vijeka moglo doći na pomicao da samostalno normira pitanja sadržana u čl. 171., 172., jer se je tim članovima utvrdilo samo ono stanje, kakvo je i u stvari postojalo, pa da i ti članci nisu ušli u Zakonik, srpski je car egzekutivne akte, dosljedno svome odnosa prema uredbi staleških sabora, mogao vršiti jedino u smislu Zakonika. Zato te norme i imadu onaj imperativno-deklatorni svoj karakter, te su ostale lex imperfecta. Da je doista tako, potvrđuje nam i Zlatna bula hrvatsko-ugarskog kralja Andrije II. od g. 1222. U to vrijeme Ugarska i Hrvatska nijesu stajale na višoj stepenici pravnog razvoja i shvaćanja, pa ipak već tu nalazimo odredbu, da ni kralj ne smije odstupiti od njegovih norma. U eshatokolu Zlatne bule, naiime, naređuje se, da palatin niti sam ne smije odstupiti od njegovih norma, a niti smije dopustiti, da bi odstupio od njih kralj, plemstvo ili bilo ko drugi. Za slučaj ipak, da bi kralj, ili koji od njegovih nasljednika uzradio protiv Zlatne bule, daje se plemićima ono famozno pravo »ius resistendi ac contradicendi«, t. j. da se mogu vladaru oduprijeti i dići se protiv njega (formalno ukinuto tek g. 1687.) To je pravo uostalom bilo normirano i u Kastiliji i Aragoniji, a jednako je ono poznato i u engleskoj Magna Charta od g. 1215. Jednom riječju ideja o nepovredivosti zakona i od strane samog vladara, bila je prirodna i normalna u svakoj staleškoj monarhiji.

Što se tiče odnosa između člana 105., s jedne, i 171. i 172. s druge strane, to moram istaknuti, da se ti članci svakako nalaze u nekoj protivštini, t. j. da članci 171. i 172. mnogo energičnije brane vladaru da egzekutivnim aktima vrijeda zakon. Bit će

da imamo razlog toj diskordanciji tražiti u okolnosti, što se član 105. nalazi u prvom Zakoniku, t. j. u onom dijelu Zakonika koji je izrađen g. 1349. (prvih 135. članova Novakovićeva izdanja od g. 1898.), a članovi 171. i 172. u drugom dijelu, koji je izrađen g. 1353./4.

Svakako je studija g. Radočića dragocjen prilog proučavanju Dušanova Zakonika, koja je pokazala koliko je potrebna jedna opća komparativno-analitička radnja o tom važnom južnoslovenskom pravnom spomeniku, pa će se onda moći i sva detaljnja pitanja riješiti sa mnogo više sigurnosti.

Marko Kostrenčić.

\*

Petar Kuničić, Petar Hektorović, njegov rod i tvrdalj, starogradske i hvarske uspomene, Dubrovnik, 1924, Srpska štamparija, str. 93.

Dalmacija je u drugoj polovini XIX. stoljeća imala pored profesionalnih naučnika onakovih ljudi, koji su voleli i nauku i pričevanje u pesmu. Nijednom se od ovih grana nisu baš specijalno bavili, ali u svakoj su ponešta, često vrlo dobra, bili. To su upravo oni ljudi koji su ponajviše podržavali po dalmatinskim varošima volju za knjigom i za naukom. Mnogi su od njih izumrli, neki još danas podržavaju tradicije te generacije, kojoj je koren u doba nacionalnog budenja i koja je svesno dočekala ostvarenje nacionalnih idea. Petar Kuničić je svojom poslednjom knjigom, koja je upravila pod naslovom »Petar Hektorović« pokazao, da je ta generacija još tu i to još uvek sa istim tradicijama, da pomaže stvaranju naše kulture, da osvetlava našu istoriju i da doprinosi svoj kamičak zgradi naše nauke. Petar Kuničić, iz Dola na Hvaru, učitelj po zvanju, pisao je putopise, pripovesti, istorisko-patriotska pripovedanja, monografije, prigodne sastavke, pevao pesme i evo izdaje jedan rad u kom nam prikazuje Petar Hektorović i njegov život, a onda dalje u kratkim crtama celu porodicu i sve baštine Petrove, sve do izumrca njegove loze i to na način, koji je strogo naučna istoriska metodika ne dozvoljava, ali koji prikazuje verno Petra Hektorovića i njegov rod, njegov dom i njegov posed. Kuničić iznosi u svojoj knjizi celu reznicu dragocenih dokumenata, koji su očito sa velikim marom uzeti i proučavani, pa i ako se njegovo delo ne može zvati naučnim, ono je daleko samostalnije od nekih istoriskih knjiga, koje su izašle u poslednje vreme kod nas, jer ono daje našoj nauci mnogo toga do sada nepoznatog. Petar Kuničić nije istoričar, ni literarni istorik; on to neće ni da bude, on je prosti književnik, koji je došao do istori-

skog arhivskog materijala i koji ga je oduševio da ga obradi. I on ga je obradio savesno i s ljubavlju, uneo k tome svoje minuciozno poznavanje miljea, u kom se to zbivalo i mi mu moramo biti zahvalni za njegov rad, bez velikih fraza i razbacivanja rečima ili znanjem.

Arhivalnu gradu upotrebljenu za ovaj rad nije Kunićić našao u kakovom arhivu, nego — karakteristično za naše arhivalne nevolje i nemar — kod mesara, kome su te stare arte īe služile za zamatanje kobasica. On je te arte īe od mesara dobio i spasio ih za nauku. (pg. 6).

Pisac je uzeo kao istinito, da je porodica Hektorovića potekla iz plemena Diviča, kako je to izneo Boglić, što se tek ima dokazati i proveriti. Svakako je tačno, da je deda Petrov bio Hektor (oko 1400 god.), a otac mu Marin sin Hektorov (Hektorović). Za Hektora je utvrđeno da je umro u Hvaru 1479. god. Kunićić iznosi njegov testamenat u celosti ne pravljajući nikako jezika, što je vrlo dobro uradio. Istina je, ima po gdekoja omaška, ali to dolazi iz toga, što je teško čoveku, koji se specijalno ne bavi paleografskim studijama, čitati dalmatinske isprave XV. stoljeća, a opet Kunićić i ne ide za tim da tačno naučno paleografski izda dokumente, nego ih on iznosi radi njihove sadržine, pa je u tom pogledu lako opaziti eventualnu omašku i naći sadržinu.

Hektor sastavi testamenat 3. jula 1467. god. U njem naređuje da mu telo bude pokopano u manastiru Dominikanaca u Hvaru »gde su pokopani moji predčasnici« (pg. 11). Interesantna su hodočašća, koja on u testamentu određuje. »Neka se za moju dušu pošalje jedan čovek u Rim.. jedan čovek u Recanati..., jedan čovek u Bari sv. Anzolu i Sv. Nikoli«. (pg. 12).

Otar Petra Hektorovića, a sin Hektorov, Marin, oženjen Katarinom Barbis bejaše potpuni aristokrata i žestoki neprijatelj pučkih nastojanja za ravnopravnosću sa vlastelom na Hvaru. On napisao spis o navalni Turaka na Hvar 1571. god. (pg. 13).

Kunićić spominje da je porodica Barbis imala »uspatornat starogradske crkvice Sv. Jerolima, gdje su živjeli pokornici glagoljaši« (pg. 15). Tu je iznesen jedan fakat, za koji je svakako trebalo dokaza, inače ovako izneseno nema nikakove ubedjujuće snage. A ipak bi bilo vredno znati, da li su ti kaluderi uopšte bili glagoljaši, a onda, ako su to bili, kada su bili i do kada su to ostali, dotično, kad su prestali da čitaju misu staroslavenskim jezikom.

Marin Hektorović umre u Hvaru 1514. god. Godinu pre toga sastavio je on testamenat. Kunićić to publikuje ovako:... die 27 bris 1514. Očito je tu štampar-

ska greška, jer bi imalo da stoji 27 bris 1514. t. j. 2 septembbris 1514. Isto je tako štamparska greška u prvom redu testamenta »X po«, kao što ne sme da stoji ni »Xpo« u prvom redu odozdo, budući da je uvek u rukopisima označeno da je to skraćenica dakle bi i u transskripciji imalo da stoji X po. Uopšte trebale bi sve skraćenice, koje su u rukopisu kao takove označene da bude i u transkripciji. Ali ovo što rekosmo ne kvari nimalo smisla.

Marin Hektorović određuje u tom svom testamentu da bude pokopan »u Hvaru u crkvi Sv. Stevana u grobnici, koju je sam dao načiniti kod oltara Tela Hristova« (pg. 15). I on određuje, da jedan čovek pode u Rim za dušu njegove majke, a jedan za njegovu, jedan u Recanati, jedan u Bari, jedan u Pogilu. Karakterističan je za njegovo vlasteosko naziranje onaj deo testamenta, u kom kaže, da ako njegov sin umre bez zakonitog naslednika ili bez testamenta, da sve njegovo imanje, ma gde se ono tada nalazilo, ima da bude prodano na javnoj licitaciji i da se dobiveni novac utroši u manastir kaludera vlasteoskih kćeri u Hvaru s tim da ne smeju da budu primljene nego samo one koje su vlasteosko porekla i kćeri vlastele. (pg. 17).

Marin je imao sina Petra i nezakonitu kćer Marišku. Govoreći o samom Petru Hektoroviću prikazuje ga pisac lepo i trezveno. Pisac ispravlja pogrešna mišljenja, kao da bi se »tvrdalj« bio nazvao po Petrovoj tvrdavi i dokazuje da se tako nazvao taj deo starogradskog kule po staroj tvrdavi, koja je bila na tom mjestu. Kunićić vrlo uspešno rekonstruiše izgled starogradskog luke u Hektorovićevu dobu.

Od ostalih je stvari važno za poznavanje života Petra Hektorovića, da je Petar Hektorović pre svog polaska u Italiju pošao, zajedno sa svojom majkom, u Istru, gde je na ladi Petra Končića kod Rovinja, 5. avgusta 1539. sastavio s majkom ugovor obzirom na testament očev i trošenje majčinog miraza. Istom je prilikom Petar napisao svoj prvi testament i poverio ga notaru u Piranu (pg 24, 25).

Kunićić se služi za ilustraciju Petrova života i njegova tvrdalja i poznatim činjenicama, koje ovde ne treba da navodim. Vrlo je interesantno za razumevanje arhitektonike Petrovog tvrdalja utvrđenje fakta da je »čitava zgrada sprjeda bila u vodi: Opus in mari totum« (pg. 27). Dobro je učinio Kunićić što je publicirao sve natpise, što se nalaze po »tvrdalju« i bašti Petrovoj; iz njih se vidi mnogo toga interesantnoga za poznavanje njegovog naziranja na svet i prirodu (pg 27—32).

Kuničić publikuje i jedan Petrov (do sada nepoznati) kodicil, koji sam upravo istovremeno publicirao i ja u »Prilozima« Pavla Popovića za 1924. god. u napisu »Dva nepoznata kodicila Petra Hektorovića (iz hvarskog kaptolskog arhiva)«. Njegova je publikacija nešto nepotpuna, verovatno, na jednom mestu, i to prvom retku, zbog abreviature, gđe treba da posle 1571 stoji *inditione XIII*, a u poslednjem retku str. 38 posle reči »vedoved«, gdje je Kuničić metnuo tačkice ima da dode reč *esser*. Ima nekoliko razlika između teksta publikovanog od Kuničića i onog, kog sam publikovao ja. Tako ima Kuničić u prvom retku, »di sua Nascita«, dok je u kaptolskom »di sua Natiuita«, u Kuničićevom »nella casa dell' habitation«, u kaptolskom »d'habitation«, u Kuničića »del sig. m. Piero Hettero«, u kaptolskom »del spt ms. Piero Hettero«. Sličnih sitnih razlika ima još, pa je zato trebalo, da Kuničić tačno označi, gde se taj prepis nalazi, da se mogu u literaturi označiti eventualne razlike, tim pre što i u kaptolskom arhivu u Hvaru postoje dva prepisa, koja isto tako pokazuju neke razlike.

Drugog kodicila Kuničić nije publicirao. Ja sam ga publicirao, zajedno sa ovim, o kom sam govorio, u »Prilozima« Pavla Popovića 1924. god.

Interesantno je, što iznosi Kuničić, da je Petar imao sestru Margaritu, koja se 1509. g. udala za Hvaranina Marina Bata p. Marina. On kaže: »Našao sam i zaručno pismo između Petra i vjerenika, u kojemu se Petar obvezuje da će dati sestri pri udaji stodukata. Godine 1522. nalazimo je udovicom« (pg. 39). Trebalо je svakako ili izneti to pismo ili označiti gde se ono nalazi. Ovako je to, rečeno bez označenja mesta gde se to pismo nalazi i bez njegova publikovanja, dosta teško uzeti kao tačno, uza svu verodostojnost pišečevu.

Od velike je važnosti za poznavanje ondašnjih naših društvenih i domaćinskih privika popis odela, koje je Petar Hektorović ostavio. Tu doznajemo (pg. 46) da je Petar Hektorović imao 11 košulja, velik broj lepih odela, 12 pari cipela itd.

Kuničić prati Petrove naslednike, sve do izumreće loze Hektorovića 1792. g., njihovo delovanje uopšte, a napose u Staromgradu i u Hvaru. Među tom vlastelom ima sudaca hvarske komune, notara, kanonika, sveštenika, kaluđerica, ljudi učenih, čudaka, pa čak i pistolova. Imat su mnogo zanimivih crtica, koje će poslužiti i istoriku i literarnom istoriku, koji bude konstruisao život Dalmacije u doba mletačke vladavine.

Pisac opisuje i današnje stanje Petrove palate, bašte i ribnjaka: »Zgrada je u mnogočem različita od Petrove osnove. »Revelin« je sasvim izjednačen sa cijelom pročeljne

zgradu, nema puškarica, saraceneška, prozora sa rešetkama. Mnogi su stari otvori na zgradi sazidani, a novi probijeni; razni urezi isčezli, kao i razni uklesani natpisi. Lijepi natpis *He u f u g i u n t neumjesno je postavljen nad vratima sa zapadne strane*. U perivoju nema Gospina kipa. Znameniti natpis o Začeću prenešen je — proti izričitoj zaboravi Petrovoj — na ulicu sv. Roka. Krov nije sasvim simetričan i krije lijepu uresnu kulu posred palače. Perivoj je donekle pokvaren neukusnim pregradama. Ribnjak, u kojem su još krasni cipli i njegovi svodovi naokolo vapiju popravka. Lukovi sa zapada neestetično su sazidani. Onaj vitki oleandar, o kojem je pjesnik pjevao... i koji je kroz četiri vijeka primamljivao pogled Hektorovićevih ljepotica i potomaka, te se natjecao u visini sa zvonikom Sv. Roka, otrog godina nemilosrdno je posječen i izguljen«. (pg. 86, 87).

Na kraju kuša Kuničić da ubičira tačno grob Petra Hektorovića, ali — po našem mišljenju — nije uvedljivo ono što iznosi. (pg. 88—91).

Petar Kuničić je svojim radom »Petar Hektorović«, koji je, po našem sudu, njegov najbolji rad uopšte, učinio veliku uslugu našoj nauci. Bez velikih pretenzija, on je izneo mnogo toga dobra i nova, on je osvetlio istoriju jednog vrlo važnog našeg grada i ostrva, on je osvetlio život jednog od prvih naših pesnika i omogućio da se poznavanje miljea, u kom je on živeo, ponudi.

Grga Novak.

\*

Dragomir Silviu, Vlahii si Moracii, studiu diu istoria românișmului balcanic, Cluj 1924.

Savesno izrađena i pregledno napisana studija o Vlasima na Balkanskom Poluotoku. S užim zadatkom i manja po obimu od rasprave K. Kadlec: O Vlasima i vlaškom pravu, koju je kod nas stručno prikazao P. Skok (Glasnik Zem. Muz., XXX (1918), 295—316), ali veoma korisna, jer razmatra zanimljivo pitanje s drugog gledišta i s drukčijim svrhama. D. S. je upotrebio veoma opširnu literaturu (iako je nije iscrpao), a kao osnovu za rad je uzeo Monumenta i ostale publikacije Jugoslavenske Akademije za proučavanje vlaške prošlosti, a za upoznavanje sadašnjosti Naselja srpskih zemalja. Raspravljanje mu je, što je prijatan izuzetak, mirno, bez strasti. Zanimljivo knjižici je dodana i karta, na kojoj su imena mesta, za koja D. S. drži da su vlaškog porekla.

N. Radojčić.

\*

Milan Prelog: Slavenska renesansa 1780-1848. — Zagreb, Naklada Jugoslovenske štampe D. D., 1924.

Dr. Milan Prelog, redovni profesor istorije Novoga Veka na univerzitetu zagrebačkom, nije novajlija na polju istorijske nauke. Još onda kad je apsolvirao studije na češkom univerzitetu u Pragu, publikovao je doktorsku disertaciju: *Voje Chorvátů s Benátkany za národní dynastií* (V Praze, 1900). Odmah ovom prvom naučnom radnjom prof. Prelog pokazao je da znade na osnovu izbora objektivno misliti i iznositi istinu. On je to pokazao u svojim *Študijama iz bosanske povijesti* (XXII izveštaj Velike Gimnazije u Sarajevu 1907/8), koje su se kretale u vremenu predana Kulina. Služujući duži niz godina na srednjim školama (u Petrinji, Sarajevu, Oseku i Zagrebu), prof. Prelog napisao je i čitav niz udžbenika iz opće istorije za niže i više razrede ovih škola, pa i prvi *Pregled povijesti Južnih Slovenaca*, Srba, Hrvata i Slovenaca (Sarajevo, 1920) posla sloma austro-ugarske monarhije i našega narodnoga oslobođenja i ujedinjenja. Najzad valja istaknuti i Prelogov rad oko istorije Bosne. Posle sumarne slike *Povijesti Bosne od najstarijih vremena do propasti kraljevstva* (Sarajevo 1910.), prof. Prelog publikovao je dve knjige *Povijesti Bosne u doba osmanlijske vladade* (I, 1463—1739; Sarajevo, 1912; II, 1739—1878, Sarajevo, 1913), a izradio ih je na osnovu pristupne mu literature, ali gdje godje i na izvorima. Ovo je uopće prvi pokušaj da se dade sintetička slika Bosne za turskoga vladanja; poznata knjiga Safvet bega Bašagića (*Kratka uputa u prošlost Bosne i Hrvatske* 1463—1850, Sarajevo, 1900) zapravo je samo mozaik složen iz turskih pisaca, i u tome joj i leži poglavita važnost.


Ali prof. Prelog nije pisao samo istorijskih rasprava, knjiga i udžbenika, nego i čitav niz prikaza i recenzija o istorijskim delima i radovima iz oblasti istorijske literature hrvatske i srpske. Ovi su članci, signirani ponajviše šifrom *Historicus*, poglavito izlazili u pokojnoj zagrebačkoj reviji *Savremeniku*, a odličan su dokaz inteligencije, znanja i načitanosti prof. Preloga. On je ovim mnogobrojnim člancima pokazao da je više čitao nego je napisao....

Kao daka češkoga praškoga universiteta i učenika poznatoga naučenjaka prof. Jaroslava Bidla, Preloga je vazda snažno privlačila istorija Slovaca, kojoj je posvetio i mnogo pažnje u svojim udžbenicima. Načinši pored nemačkoga i francuskoga jezika još i dobro češki, polski i ruski, on je tako stekao onu potrebnu spremu da se mogao dati na poučavanje slovenske istorije,

koja je redovito u nemačkoj, i u opšte u zapadno-evropskoj istorijskoj literaturi, slabo obrađena. Šta više, ni kod nas nije lako raditi na polju češke, poljske ili ruske istorije, jer sve su naše javne bibliotekе obično nepotpuno snabdevene takvim naučnim delima, a još manje monografijama. U tome čini iznimku — možda u čitavom slovenskom svetu — Prag, ta matica slovenstva XIX stoljeća. Tako se zgodilo da je prof. Prelog pošao u Prag i onde kroz više od godine dana intensivnoga rada skupljao građu za svoje delo koje je zamislio još u domovini, a koje je tu skoro izšlo s gornjim navedenim natpisom. Prof. Prelog naumio je najpre da napiše knjigu samo o poznatom prvom — i dosada jedinom — sveslovenskom Kongresu, održanom u Pragu krajem maja i početkom juna 1848. No brzo se uverio da mu rad ne bi zadovoljio čitaoce, kad bi se ograničio tek na sam Kongres. Trebalo je i pokazati koje su ideje i političke prilike između samu misao Kongresa g. 1848, jer on je zapravo završetak dugo-godišnjega razvoja slovenskoga preporoda od kraja XVIII stoljeća dalje.

S tim proširenim programom u vezi, Prelogovo delo se deli na dva dela. Prvi deo (glave I do XVII) prikazuje početke slovenskoga preporoda redom kod Čeha, Rusa, Poljaka, Slovaka, Malorusa, Srba, Hrvata i Slovenaca, njihov dalji razvoj, i potom težnje za međusobnim zbljenjem Slovaca i opšte. Drugi, veći deo (gl. XVIII-XXV) bavi se pripravama za slovenski Kongres, onda samim Kongresom, i najzad posledicama njegovim.

U prvom delu prof. Prelog više je referent, i to odličan referent. On je u toj par-tiji svoga omašnoga dela — ima 480 stranica velike osmine — u prvom redu iscrpao golemu istorijsku literaturu, novine i časopise raznih slovenskih naroda, ali ipak tako, da je svaki put gde god je mogao, segnuo i za izvorima, naročito za korespondencijama i memoarima. Drugačije i nije mogao da postupi, jer je nemoguće tražiti od njega da obide i sve one nebrojene arhive i biblioteke po širokom slovenskom svetu, ne bi li možda našao koje novo zrnce, izmaklo tolikim češkim, poljskim, russkim i ostalim monografistima. No još jedno treba istaknuti. Prof. Prelog nije u tom prvom delu svoje knjige dao istoriju slavistike (kao n. pr. Jagić u poznatom ruskom delu), nego je on dao sintezu razvoja slovenske ideje s političkoga gledišta. Ovakva dela pak nema u opšte još u slovenskoj nauci. To je prvi pokušaj takvoga teškoga rada. Profesor praškoga universiteta Jaroslav Bidlo, koji je počastio ovu knjigu kratkim predgovorom, zato dobro kaže: »U tome što



„Aljina“ ženska iz sela Sige (Metohija). (Iz „Vode kroz Etnografski muzej u Beogradu“).

sconi »Un documento marmoreo dei Porcia« i izvještajem o proslavi u počast pokojnog arhitekta Enrika Nordio, koji je stekao velikih zasluga za grad Trst.

Ovo, što je do sada spomenuto o ovom godišnjaku, pokazuje dovoljno, da mnoge njegove članke ne smijemo da pustimo s vida.  
J. Nagy.



*Kiridžije na putu. (Iz „Vode kroz Etnografski muzej u Beogradu“.)*

Kako nastaju i živu »narodne« pesme. U ljubljanskom »Dom in Svetu«, 1924, str. 207, sl. napisao je g. dr. A. Res raspravu »Bistvo narodne pesmi« — punu nemačke teorije, kao da izvestan deo naše inteligencije uopće ne poznaje druge nauke od nemačke —, ali interesantnu zbog specijalnih slovenačkih primera, što ih navodi i koji pokazuju, kako se pesma u narodu promenjiva, a kako mogu kraj sviju promena neki stihovi (početni) ostati, ma da su u metamorfozama teksta već izgubili svaku značenje. God. 1873 naštampale su novine »Soča«, koje su onda izlazile u Gorici, jednu pesmu Katice Stanićeve iz Kanala nad Sočom, izraz ljubavne prevare te djevojke; pesma je glasila:

*Soča voda je šumela,  
mesec svitlo je sijal,  
jaz pri oknu sem slonela,  
ko si ti slovo jemal.*

*In zdaj vselej, ko velika  
Soča na večer šumi,  
in ko lune svitla slika  
iz vode se zablišči,*

*vselej te na mostu stati  
vidim v duhu pred seboj,  
veličastni mesec zlati  
razsvetljuje obraz twoj.*


*Vidim te, kako desnico  
znancem daješ za slovo,  
meni pa si dal levico  
in še to le prav hladno.*

*Nij se tebi zdele vredno,  
da prodal bi desno bil,  
in spomin na te bo vedno  
dušo mojoj žalostil.*

*Kolikokrat se jaz spominjam  
na ta žalostni večer,  
solze grenke si otrinjam  
vedno, zmirom, v eno mer.*

U Kanalu ima most preko Soče, Devojka gleda u mesečini na most, gde se sa svojim poznatima opršta njezin dragi, ali mnogo toplije nego se je ranije oprostio od nje. Od onda je ona uvek žalosna, kad god se seti one večeri. — G. 1899, dakle 26 godina docnije tu je pesmu napisao u Dolenjskoj Kranjskoj (jugistočno od Ljubljane), dakle daleko od Soče, g. Marko Bajuk kao narodnu pesmu, ali promenjenu ovako:

*Soča voda je šumela,  
mesec je na nebu s'jal,  
jaz pri oknu sem slonela,  
ko si ti slovo jemal.*



*Gusle iz Srbije, Crne Gore i Bosne. (Iz „Vode kroz Etnografski muzej u Beogradu“.)*

*Drugi si podal desnico  
in poljubil jo sladko,  
meni pa si dal levico,  
pa še to tako hladno.*

*Milo luna je sjala,  
bled mi gledala obraz,  
zadnjic roko sem ti dala,  
zadnjic, ah, za večni čas.*

*Mnogo let je že proteklo,  
kar izginul je moj raj,  
srce takrat mi je reklo,  
da ne prideš več nazaj.*

*V tujem kraju zdaj prebivaš,  
ah, kak srce me boli!  
Tamkraj z drugo srečo vživaš,  
moj spomin te ne kali.*

Motiv je pesme u glavnome isti i početak je isti, ali nestalo je, naravno, mosta preko Soče, pošto u Dolenjskoj Kranjskoj most preko Soče za pevača, koji se identificira sa pesmom, ne bi imao smisla. I pak je u početku Soča voda ostala kao karakteristikom pesme, kao njezin, rekao bih, muzikalni motiv.



*Preslice iz Srbije i Crne Gore. (Iz „Vode kroz Etnografski muzej u Beogradu“.)  
Isp. slike u I. knj. „Narodne Starine“, str. 76. i 77.*

G. 1910 podao je g. Janko Žirovnik pesmu  
još dalje promenjenu:

*Soča voda je šumela,  
mesec je na nebu s'jal.  
Ti pri oknu si slonela,  
ko sem jaz slovo jemal.*

*Drug'mu dala si desnico,  
poljubila ga sladko,  
meni dala si levico,  
pa še to tako hladno.*

*Mila luna je sijala,  
bled mi gledala obraz,  
zadnjič roko s' mi podala,  
zadnjič, oh, za večni čas.*

*V tujem kraju zdaj prebivaš,  
oh, kak me srce boli,  
tamkaj z drugo srečo vživaš,  
moj spomin t' je ne kali.*

Uvodni stih sa Sočom je ostao, iako inače o Soći više nema govora, ali »junak« pesme mesto devojke postao on, momak. Kod te su promene nastale neke neskladnosti: da je ona drugog a u njegovoj prisutnosti poljubila, a da je on ipak uzeo njezinu ruku? I da ona, naslonjena na prozoru, u potpunom miru sve to radi? (U zadnjoj bi kitici valjda moralo biti: z drugim).

Pesma se je, idući kroz »narod«, primenjivala posebnim situacijama i promenjivala se; rezultat je onda taj, da se staro sa no-

vim veže, a ne svaki puta organski te imamo zato u narodnim pesmama često (u manjim stvarima) disharmonije. Uvodni pak je stih ostao, ma da je izgubio za pesmu pravo značenje. — Pesma »Soča voda je šumela« vredila je dosada u širim pevajućim krugovima za narodnu, ali ko poznaje narodnu pesmu, osećao je, da to ne može da bude narodna pesma; u privatnom sam razgovoru ja to već davno rekao, samo nisam znao, čija je pesma.

Kako »narod« gospodski sebi podvrgava umetne pesme, koje je inače zavoleo, pokazuje i primer Gregorčićeve »Izgubljeni cvet« (t. j. izgubljena devičanska nžinost). Gregorčić je nevinost prikazao kao vrtić, koji je djevojka imala, a koji je momak pobratio te onda pevajući preko polja otišao. Ovu je simbolsku pesmu narod u Štajerskoj protumačio jasnim realizmom te dodao koricu: »Zakaj bi ne vriskal, zakaj bi ne pel, saj mlad' mu dekletu nedolžnost je vzel.«

K tim izvodima g. dr. Resa mogao bih ja dodati jedan primer iz poljske literature. Najbolji poljski lirik iz takozvane »stamislavovske« periode (iz periode kralja Stanišlava Augusta Poniatowskoga) je Franciszek Karpiński (1741—1825), psevdoklasicistički pesnik ljubavnih idila prema uzoru Teokrita i Vergilija; vrlo popularna je postala njegova idila »Laura i Filon«, koju je na pr. studentski krug Adama Mickiewicza u Vilnu pre 100 godina vrlo rado pevao. Pesma je prilično duga te nam prikazuje sastanak Filona i Laure u mesečnoj noći: kako nastaje među njima malen nespričljiv, kako se posle oduljeg dialoga ipak slože, kad eto već drugi puta petao zapева. Tu je pesmu poljski narod — poznajem njezinu narodnu varijantu iz okolice Krakova — skratio, lišio je mesečnog sentimentalizma te joj dao divnu poetičku snagu sa svežim narodnim obratom: »Hej hola, hola, mamusia moja. Dr. Fr. Ilešić.

\*

Dr. Edmund Schneeweiß, *Die Weihnachtsbräuche der Serbokroaten*. Wien, 1925. Poslije radova, koje je autor ovoga djela štampao većim dijelom u »Zeitschrift für österreichische Volkskunde«, stao je intenzivno proučavati folklor južnih Slavena na samom njihovom teritoriju (kao lektor univerziteta u Beogradu). Napose je za to vrijeme spremao obilan materijal božićnih običaja s njihovom naučnom obradom, što je u gornjoj knjizi izdao (doštampano 1924., kao »Ergänzungsbnd XV. zur Wiener Zeitsch. f. Volkskunde«).

Cjelinu toga opsežnog rada (232 str. u 8°, petitem štampanih s 2 slike i 1 kartom, tvore



*Devojka sa Kosova. (Iz „Vode kroz Etnografski muzej u Beogradu“.)*

dvije partie, odvojene po namjeni i po metodu. Prva (Festkalender der Weihnachtszeit) — deskriptivna, sadrži samo materijal božićnih običaja i Hrvata i Srba, do svih pojedinosti pomno pribran i prema elementima, od kojih se sastoje, grupiran. Druga manja (Zur Herkunft und Deutung) — sinte-



*Unutrašnjost kuće u Potočcu-Temnić. Kujna. (Iz „Vode kroz Etnografski muzej u Beogradu“.)*

tička i eksplikativna, upravo je glavni dio knjige, gdje se niži dalji izvodi iz prikazane građe: o izvoru resp. starini pojedinih elemenata ovih običaja (badnjak, polaženik, darovi i slastice, uloga vode, kult predaka, žrtva svinje, panspermija božićna slama i t. d.), o njihovim svezama među sobom i prema običajima drugih, naročito susjednih naroda, o njihovu značenju, izvornom ili pomučenom, jasnom ili zaboravljenom — Opsežno, redovno upravo iscrpno navođenje originalnoga materijala u prijevodu (u prvoj partiji) naći će svoje opravdanje, kad se uoči u prvom redu namjena knjige i stranoj nauci, gdje je sam materijal ove vrste tek u manjem opsegu pristupan, a autor ga je i iz objelodanjene i iz rukopisne, tude i vlastite grade temeljito pocrpao, što svjedoči i obilan registar literature. Osim toga ovakovo razvrstavanje čitava prikupljenog materijala tvori već samo neki temelj daljom naučnoj obradbi i unatoč tome, što se na taj način mora da izgubi jedan etnografski momenat: grada se rascjepkava, pa je pregled čitavih lokalnih kompleksa svih običaja, kao cjelinu, veoma otegočen, a potome i studij tih kompleksa, teritorija, koji obuhvataju, diferenciranja i odvajanja prema tim teritorijima. Do izražaja dolaze ovi momenti kod određivanja utjecaja tudihih naročito susjednih običaja, pa se toga autor i doticao u drugom dijelu. Nego proučavanje

njegovo o utjecanju i odnosima čitavih kompleksa božićnih običaja tudihih i naših došlo je u jednom osobitom pravcu, u velikom mjerilu, do izražaja. To je rezultat, na koji je pisac bjelodano stavljao težište: da su božićni običaji srpski i hrvatski (negdje se nazivaju »srpski« negdje »srpsko-hrvatski« pa nije jasno, da li se misli isto) pored izvornih neznabogačkih elemenata i kasnijih kršćanskih gusto protkani klasičnim običajima rimskoga svijeta, što su vladali u čitavom rimskom imperiju i nasrtali preko njegovih granica. Pored ovoga zauzima autor svoje stajalište i prema tumačenjima božićnih običaja u drugih istraživača, pa im pridaže djelomično i karakter kulta pokojnika i karakter solarne svečanosti dotično kulta prirode uopće, dok posebno naglašava i elemente kulta mjeseca. Mnogo znatnijih paralela ovih običaja i u Slavena i u ostalih indoevropskih i neindoevropskih naroda čine studiju još instruktivnijom, a nema sumnje, da će mnoge pojedinosti u njoj biti zameci za dalje specijalno njihovo istraživanje i dati pobudu i uzor za produbljivanje studija običaja u južnih Slavena. M. G.

\*

Božja kroz Etnografski muzej u Beogradu.  
Državna štamparija kraljevine SHC Beograd  
1924. — 8°.

Svaki muzej, kojemu uprava ispravno shvaća zadaću, mora pored čistih znanstvenih ciljeva da služi i praktičnim zahtijevima naravnog prosvjećivanja prikazujući zornim načinom rezultate istraživačkoga rada iz područja, što ga taj muzej zastupa. Uz pregledno i estetsko raspoloženje muzejske građe nužni su pokraj pojedinih objekata natpisi, kojima se u što kraće ali sadržajnoj formi daje objašnjenje njihova značenja, a uz\*to t. zv. vode ili vodiči, štampani tumači, redovno u obliku manjih knjižica, u kojima može posjetilac prema rednom broju muzejskih dvorana, vitrina i izloženih predmeta naći glavno, što treba da o posljednjima znade. Takovi su »vode« kadšto i celishodniji od inače svakako najboljega pomagala za upoznavanje muzejskoga materijala, a to su t. zv. »vodenja kroz muzej«, strukovnjačko predavanje upriličeno naročito od muzejskog znanstvenog osoblja, kojemu je to jedna od važnih dužnosti, no to teže, ako je takvoga osoblja na muzeju premalo, kako to redovno biva baš i u našim muzejima.

Da doskoči jakoj potrebi svoga instituta uprava je Etnografskoga muzeja u Beogradu izdala za svoju zbirku lijepo opremljena »vodu«, koji ima da posluži izloženoj svrsi. 23 stranice teksta pregledno i zbito nam tumače važnost objekata svrstanih u 6 dvorana, koje uz 2 kancelarijske sobe čine uopće sve muzejske prostorije. Naravno, da u tako skućenom prostoru bogata, premda za svjetskog rata znatno nastradala zbirka, ne može doći do onakova izražaja, kakav bi ona u smislu modernih museoloških principa zaslužila prema svojoj vrijednosti a i bez obzira na ljubav, kojom je stvorena i upravljana. Doista je već skrajnje vrijeme, da se provede bar ona osnova, koja ide za tim, da se u svrhu proširenja muzejskih prostorija nadograditi na sadašnju zgradu još jedan sprat.

13 tabla sa slikama nekih važnijih i interesantnijih pojedinačnih ili u grupi svrstanih predmeta izrađenih prema fotografijama poznatog i neumornog nažalost danas još uvijek nedovoljno cijenjenog muz. upravnika Nikole Zege lijepo nadopunjaju tekst iz pera istog upravnika te agilnog kustora dra Bor. Drobnjakovića. Na omotu se nalazi slika i tlocrt muzejske zgrade. Format je nešto prevelik za praktično »džepno izdanje« u upotrebi muzejskog posjetioca.

Beogradski muzeji još nijesu međusobno strogo diferensirani pak se u Etnografskom muzeju nalaze i bogomilski (babunski) stećci iz Srbije. Ovaj muzej raspolaže međutim i dobrim i mnogim modelima seoske arhitekture. Rečeni izloženi materijal je uopće smješten zasad u tih šest dvorana, i

vrijedan je, da se š njime upozna svaki jugoslovenski inteligent i tako nadopuni sadržinu svoga znanja o kulturi širokih slojeva u istočnom dijelu naroda. Zbog bolje informacije prilažemo ovom referatu i nekoliko ilustracija iz rečenoga »Vode kroz Etnografski muzej u Beogradu«.

Red je sada i na drugim našim etnografskim muzejima da izdadu svoga »vodu«, i da se tako povedu za svojim beogradskim drugom.

Vladimir Tkalcic.

\*

Известия на народния етнографски музей въ София. Bulletin du Musée ethnographique national de Sofia. Fond G. S. Rakowski. g. I., II. i III. 1921.—1923. Narodni etnografski muzej postoji u Sofiji већ 14 godina kao samostalno kulturno udruženje. Zato је врјеме порасла знатно ова исправа скромна zbirka. Само малени dio ove zbirke pristupačan је zasada javnosti. Da se prikaže djelovanje tog muzeja izdaje zavod svoja Izvjestija, dok још nema specijalnog etnografskog časopisa u Bugarskoj. Prva Izvjestija su izašla g. 1907. pod redakcijom D. Marinova, direktora etnografskog muzeja, no morala su prestati iz materijalnih razloga. Sada је stvoren posebni fond G. S. Rakovski, od kojeg ће se izdavati nova Izvjestija za etnografske i druge naučne rasprave, važne za bugarsku kulturu. У тим ће се Izvjestijama raspravljati о bugarskom narodu uopće i prema sabranom materijalu. Redakcija je povjerena posebnom redakcionalnom komitetu. Časopis izlazi tromjesečno а стоји на godinu 60 leva, а pojedina knjiga 15 leva. Preplata i svi upiti шалju се на Народни etnografski muzej u Sofiji. Iza svakog članka nalazi се kratak pregled na francuskom jeziku, te је tako тaj Bulletin приступачан i западном kulturnom svijetu. Između mnogih članaka zanimljiv је onaj I. godine od Stoilova, koji priopćuje bugarsku narodnu priču: Vojnik na svadbi svoje žene, i u njem donosi i neke srpsko-hrvatske varijante, te varijante kod drugih nasepo slavenskih naroda. Ovaj motiv imade u bugarskoj narodnoj poeziji 53 varijante sa 40.000 stihova iz sviju krajeva gdje stanuju Bugari. A sadržaj pjesme је ovaj: kako je neki vojnik na dan svog vjenčanja bio pozvan u rat te morao isti dan ostaviti svoju mladu ženu, koja mu је dala kitu cvijeća, da је pomno čuva, da ne uvene, jer kad буде uvenula, onda ће se ponovno vjenčati. To se je dogodilo iza devete godine, а vojnik je krenuo kući baš kada se je trebala njegova žena ponovo vjenčati. Ona ga је prepoznaла по vjenčanom prstenu, te је napustila drugog vjenčenika i ostala uz svog prvog muža. Ova

pjesma imade svoj početak na zapadu, a u Italiji nalazimo u knjigama već u XIV. stoljeću taj motiv, koji je zatim prelazio iz jedne zemlje u drugu. Kako je došla ta pjesma u Bugarsku ili usmenom predajom ili knjigom, nije još utvrđeno. Središte joj je u Panagurištu blizu Plovdiva, gdje imade najtočnijih varianata. — Članak o narodnim nošnjama od St. Kastva je bogato ilustriran sa koloriranim slikama. Tu se specijalno prikazuje ženski makit na glavi ili sokij, koji je ostanak bizantinskog diademata, koji se je preko sve turske dobe sačuvao u Bugarskoj u Trnovu, te u mnogim mjestima Mačedonije. Bugarski narodni diademi su vrlo lijepi i urešeni svilom i zlatom te novcima i lančićima a u jasno crvenoj boji. Sokiji se nose sa visokom frizurom, te su ostanak bizantinskih plemičkih diademata, koji su se sačuvali i kod židova do danas u Alžиру. U srednjem vijeku su nosile takove nakite na glavi francuske dame, koji običaj je prenešen iz istoka na zapad. Zanimljivo je kraj toga, što bugarske žene same priredjuju svoje sokije dapače i materijal za taj lijepi historički nakit. I u Egiptu se je kod Kopta sačuvao isto takav nakit. Prema tome mu je original od davne davninze.

Na koncu svake sveske nalazimo recenzije i bibliografiju, u koliko se tiče bugarske etnografije i ostalih etnografskih slavenskih djela. Zanimljiv je prikaz Zbornika, koji je izdan g. 1920. od 15 učenika prof. Iv. Šišmanova njemu na počast za njegov 30 godišnji književni rad.

U drugoj svesci I. g. prikazuje A. Stoilov opis Folklorističkog Zbornika Rakovskoga, koji je on sastavio 2. I. g. 1857., ta se je mislilo, da je izgubljen, a sada je nanovo pronađen, te sadrži veliko narodno blago bugarskih pjesama.

Zbornik imade naslov: Staroblgarski narodni pjesmi, a pronašao ga je njegov nečak pukovnik At. Rakovski. Tu imade preko 4000 starih narodnih bugarskih pjesama od neprecjenjive folklorističke i etnografske vrijednosti.

G. Išikov piše o Dakoromanima sa balkanskog poluostrva sa detaljnom etnografskom kartom Dobrudže, gdje su prikazani od Varne do Galca naseljeni krajevi Bugara, Rumunja, Turaka, Tatara, Rusa i Nijemaca. Probrana je velika literatura o tom pitanju na svim jezicima. Pisac je pristaša teorije profesora Weiganda, koji tvrdi, da su Rumunji nastali romaniziranjem od Tračana i da su se naselili na sjever preko Dunava, a nastali su u krajevima od Skoplja do Sofije. Daco-Rumunji su se naselili u posljednja tri stoljeća sa sjevera na Dunav i po Dobrudžu, koja je bila opustošena od silnih ratova Austrijanaca, Mađara, Turaka, Rusa, Poljaka i Rumunja.

Dako-Rumunja imade oko 200.000 na sjeveroistoku Srbije, 80.000 po obalama Dunava, 170.000 u Dobrudži, u svemu dakle oko pol milijuna. Bugara imade u Besarabiji, Moldavskoj i Vlaškoj 440.000 a u Banatu 20.000. Bradaška je pisao g. 1868., da su naselja Bugara na sjeveru Dunava te naselja Rumunja na jugu Dunava bez ikakve političke vrijednosti. No tu se je ljuto prevario, jer su Rumunji baš na temelju toga svojatali pravo na bugarski dio Dobrudže. — M. Milev prikazuje bugarska osobna i obiteljska imena od XVII. stoljeća.

U II. godištu Izvjestija 1922. piše U. Iširkov o imenima bugarskih gradova, mesta o zemljištu na kojem se nalaze, po rijekama, koje protiču gradove, prema suncu, vegetaciji, po imenima životinje, po mineralnom bogatstvu, po kakvoj osobitoj građevini u mjestu, prema kojem trgovac kom objektu u mjestu, po nekim osobama, prema nekim bojama, koje su ističu u mjestu, i t. d. Pisac tvrdi, da su neka imena kao Pešta, u Madžarskoj, Belgrad u Srbiji i Albaniji, Prizren, Prilep, Leskovec, Jagodina i druga postala od bugarskih Slavena. Svakako je vrlo zanimljiva studija imena mesta sa strane tumačenja historije, etnografije i narodnog gospodarstva. — V. Zlatarski opisuje ogromne hljebove, koje su Bugari pekli u XI. st., i koji se je običaj sačuvao do danas u nekim krajevima. Ti su hljebovi bili tako veliki, da su se mogli od jednoga deset ljudi nahraniti. U Mačedoniji su takav kruh pekli ne samo seljaci nego i građani i bogataši. Nadbiskup u Ohridu spominje jednog čovjeka, koji je sam pojeo za ručak osam najvećih hljebova, kako su onda u XI. stoljeću za njegovo vrijeme pravili u Bugarskoj i Mačedoniji. — D. Kastav prikazuje sa slikama razne srebrenе votivne predmete u svrhu zagovora kod bolesti, koje se davaju raznim crkvama i manastirima.

Zavjet i zavjetni dar Bugari jednako nazivaju »obrok«, koji je kod Bugara uvejk samo od srebra a ne od voska ili drva. Takovi darovi jesu: glava, uho, oko, noge, ruke, cijelo tijelo djeteta, što znači da žena želi zdravo dijete roditi. Jaram, kola ili dva vola znači, da seljak želi dobru žetvu. A. Andrejev opisuje ribolovstvo u nikopoljskom kraju. Tu se spominju ribe prve i druge kvalitete i kako se pojedine vrste love. Prikazane su slikovito i sve sprave, kojima se ribe love, čamci i mreže a opisuje se i život ribara te upute glede lova zimi na Dunavu kod Nikopolja. — M. Popruženko piše o narodnom probuđenju i oslobođenju. Najviše materijala za preporod Bugarske nalazi se u ruskim arhivima. Tu se nalazi materijal o osobama, koje su

u savezu sa preporodom Bugarske, poglavito sa Najdenom Gerovom, prvakom preporoda Bugarske. Instrukcije Gerova u Rusiji, njegovo djelovanje kao konzula Rusije. U Plovdivu bilo mu je omogućeno sarađivati sa mnogim ljudima od vlade i nauke u Rusiji. Tako su vrlo simpatično za Bugarsku radili knez Voroncov, koji je pomagao otvarati bugarske škole u Rusiji, profesor Pogodin, koji je pomagao nastojanju mladih Bugara da studiraju u Rusiji, te arhiepiskop Inokentije, koji je bio na čelu bugarskog komiteta u Odesi, te mnogo nastojao oko naobrazbe mladih Bugara. A. Strašimirov piše o plemenu Rupci, koji stanuju po brdinama Rodope, Rilo i Standž planine, te su stanovali u rupama ispred neprijatelja. Rupci su sačuvali mnogo starih oblika govora, te imadu mnogo grčke mješavine u svojim riječima, jer su im Grci najbliži susjedi. Bizantinci su rastepli Bugare u onim krajevima i nadomjestili Grcima. Kasnije su opet došli Turci i većinu naroda preveli na Muhamedovu vjeru. Ovi Bugari, koji su se poturčili, zadržali su bugarski jezik te se nazivali Pomaci. Posljednji njihov narodni vođa bio je vojvoda Momčilo i njegova žena Momčilica, kojih djelovanje se još danas legendarno spominje u tamošnjem narodu. Turci su ih jako proganjali, te su mnogi emigrirali poglavito nakon rusko-turskog rata u XIX. stoljeću u južnu Rusiju. — D. Molerov prikazuje ikonopis u Banskom kraju. Slikanje ikona počelo je u tom mjestu u XVIII. stoljeću, kada je počela trgovina iz grada Sesera u Beč a sa svilenim čahurama. Saobraćaj sa Bečom je uplivao na stanovništvo u Banskom, gdje se je opazio trag bečke manire. Osobito se je to istaklo u slikanju ikona, jer je jedan Bugarin iz Banskoga u Beču naučio slikati ikone. Tada su ga počeli nazivati Molerom ili slikarom, koje se je ime kao i slikanje ikona u Banskom dodana sa sačuvalo. Njegov sin i unuk su nastavili sa »molovanjem« te su tamošnje ikone mnogo lijepše od onih, koje dolaze iz Makedonije.

U III. godini nalazimo također nekoliko vrlo zanimljivih članaka u Izvještijama. Naročito je spomen posvećen stogodišnjici Najdena Gerova, koji je bio prvi Bugarin, koji je svršio sveučilište u inozemstvu, u Odesi, te je sastavio i izdao veliki bugarski rječnik od 70.000 riječi u šest dijelova u g. 1895.-1904. P. Pančev je napisao o njemu posebnu knjigu, koja se tu također posebno prikazuje. Gerov je bio jedan od prvih bugarskih pjesnika, prvi bugarski diplomata kao ruski konzul u Bugarskoj. On je još kao đak sakupljao narodne pjesme i poslove Bugara emigranata u Besarabiji i na Krimu, te je animirao svoje prijatelje za

bugarsku folkloristiku. Imao je veliku korespondenciju sa inozemstvom, a dva velika sveska njegovih dopisa izdala je Bugarska Akademija Nauka u Sofiji.

Trifonov piše o bugarskim pjesmama i njihovim historičkim vezama iz XVI. stoljeća. Borba Bugara s Turcima ostavila je trag i u njihovim narodnim pjesmama. Spominju se pjesme o padu Budima i o bugarskoj kraljici Izabeli, ženi Ivana Zapolje. Budim je zauzeo Tatar-paša a kraljica se zove »Jane belo grlo«. Bijela Jana potiče iz grada Zlatne jabuke, gdje izvire Dunav. Narodne pjesme spominju i neuspjeli pohod vezira Sulejmanna na Maltu, koju je branila legendarna djeviča Marija Todora, te uz pomoć blažene djevice Marije grad spasila. Kad je prestala turska sila i nastalo oslobođenje, spominje se mnogo u narodnim pjesmama vojvoda Mihajlo Vitazno iz vremena Kraljevića Marka. Zanimljivo opisuje P. Čilev, da su se u bugarskoj narodnoj tradiciji sačuvali uspomene na starca Harona, koji prevozi duše preko Styxa. Ova se je mitska priča sačuvala u Grka, od kojih su je preuzeli i Bugari, u krajevima, gdje u su u najblžem doticaju sa Grcima. Bugari još danas zakapaju svoje mrtve sa novcima za starca Harona. Analogni slučaj nalazi se i u istočnoj Srbiji. Ovo vjerovanje sačuvalo se je preko Tračana, Mačedonaca i Iliraca, a poznavaju ga i Albanci.

Dr. Gončev prikazuje »Narodno slikarstvo u Gabrovu«. Svi domaći predmeti slikaju se kod kuće sa raznim biljevinskim bojama, te se zajedno kuhaaju, dok nisu obojadisani. Tako platno, svila, koža i razni drveni predmeti. Pomalo međutim nestaje narodnih biljevnih boja, koje zamjenjuju kupljene anilinske boje i druge kemijske. Narodno slikarstvo se pomalo pretvara također u industriju, te prestaje biti domaćim narodnim zvanjem i obrtom. — St. L. Kostov prikazuje članak o novcu kao nakitu, u kojem se prikazuje sa slikama više takovih nakita za glavu i vrat od srebrenog i zlatnog novca. Osobito je krasan i bogat nakit za nevestu u selu Gornja Banja u sofijskom kraju. Osim toga su prikazani i bogati nagrudići od samih zlatnih novaca, te podbradnići i ogrlice i vratni nizovi od samih zlatnih dukata.

S. Kostov se sjeća 50 godišnjice švedskog narodnog muzeja u Stockholmu, koja se je prošle godine svečano proslavila u Švedskoj. Utjemeljitelj tog muzeja jest Arthur Hazelius, g. 1873., koji je počeo sa neznačnom etnografskom zbirkom a danas se diže ogromna zgrada Nordiske Museet putem nürnbergskog Germanisches Museum. Uz taj muzej nalazi se i veliki otvoreni muzej Skansen, u kojem se prikazuje cijelo selo u originalnim kućama iz raznih krajeva

Švedske sa potpunom faunom i florom i narodnim običajima. U Švedskoj su još dva velika narodna muzeja i to u Upsali i Lundu, gdje je poglavito etnografski odio uvelike zastupan. U južnoj Švedskoj u Lundu povećat će se narodni etnografski muzej na taj način, što je stvoren konsorcij, koji je kupio cijelo jedno selo, koje će se oču-

vati u cijelosti kao etnografska cjelina. Među raznim etnografskim časopisima spominje se i naš časopis »Narodna Starina«, koju vrlo povoljno ocjenjuje i prikazuje S. Kostov, te veli, da časopis obećaje važne prinose za jugoslavensku etnografiju.

Dr. Franjo Bučar.

#### DAROVI »NARODNOJ STARINI«.

15. Poglavarstvo kr. i slob. grada Varaždina

Din. 2.300.—

#### BILJEŠKE

\* Studentsko Istorisko društvo u Beogradu. Početkom ove godine (16.I. 1924.) inicijativom nekoliko studenata osnovano je na Beogradskom Universitetu Studentsko Istorisko Društvo. »Zadatak je Društva da potpomogne struč-

no obrazovanje svojih članova« (čl. 2. Pravila) »Društvo odgovara svom zadatku: 1. održavanjem svojih sastanaka, na kojima se čitaju istoriski sastavci, drže predavanja o pojedinim periodama istorije, 2. skupljanjem istoriske grade; 3. priređivanjem naučnih



Mlada žena sa poculicom, iz općine Brezovica (kotar Zagreb). (Vidi N. S. II. s. 293.)



Mlada žena s poculicom i rupcem, iz općine Brezovica (kotar Zagreb). (Vidi N. S. II. s. 293.)

ekskurzija; 4. osnivanjem svoje knjižnice i čitaonice; 5. priređivanjem naročitih kurseva za učenje stranih jezika; 6. izdavanjem almanaha i drugih istoriskih publikacija; 7. stajanjem u vezi sa ostalim srodnim društvima« (čl. 3. Pravila). Pored 72 redovna

člana Društvo ima i 7 počasnih članova: g. dr. Dragutina Anastasića, red. prof. Universiteta; g. dr. Nikolu Vučića, red. prof. Universiteta; g. dr. Jovana Radonića, red. prof. Universiteta g. dr. St. Stanovića, red. prof. Univ.; g. dr.